

藏書紀事詩

耐庵題籤

藏書紀事詩卷四

長洲葉昌熾

好書盡職奉

綸音朱邸牙籤枕玉琴河間東平無愧色豈惟博物邁甄琛

怡親王 果恭親王 成親王

陸心源宋槧婺州九經跋怡賢親王收藏王爲

聖

祖仁皇帝之子其藏書之所曰樂善堂大樓九楹積書皆
滿絳雲樓未火以前其宋元精本大半爲毛子晉錢遵王
所得毛錢兩家散出半歸徐健庵季滄葦徐季之書由何
義門介紹歸於怡府乾隆中 四庫館開天下藏書家皆
進呈惟怡府之書未進其中爲世所罕見者甚多如施注
蘇詩全本有二此外可知矣怡府之書藏之百餘年至端

華以狂悖誅而其書始散落人間聊城楊學士紹和常熟翁叔平尙書吳縣潘文勤錢唐朱修伯宗丞得之爲多昌熾案怡府藏書始自怡賢親王之子名弘曉余聞之盛伯希祭酒云存齋所言攷之未詳也 怡親王明善堂詩集張純熙序親王冰玉主人至性夙深忠勤體國平居積學好古凡經史傳記以及諸子百家之編靡不採其深賾得其高朗、又伊都立序冰玉主人殿下天姿高華澄心墳素士安之萬卷咸披應奉之五行俱下方斯蔑如也 嘯亭雜錄果恭王諱弘瞻 憲廟第七子也嗣果毅王

後善詩詞幼受業於沈懋士尙書故詞歸正音不爲凡響昌熾謹案嗣王允禮亦工詞翰著自得園文鈔 又成親

王諱永理爲

純廟第十一子善書法士大夫得片

紙隻字重若珍寶

成親王諡晉齋集家有書積漸多矣

以經史子集次其目題以長句錦軸牙籤富自誇深居也
說積書家空巢未肯從東野拈買猶須歎浣花檢處熒熒
銀燭短收時故故玉琴斜甄琛博物伊何有政可慙人惠
子車 李文藻琉璃廠書肆記寶名堂周氏購得果親王
府書二千餘套列架而陳之其書裝潢精麗俱鈐圖記

平津館鑒藏書籍記元板春秋纂例孫退谷藏書有果親
王府圖籍朱文方印果親王點定朱文長印元版南史有
果親王府圖書記朱文長印 昌熾案怡府藏書之印曰

怡府世寶曰安樂堂藏書記曰明善堂覽書畫印記明善

堂集卷端有

御題明善堂印

御題銀潢派

裏圭璋器

天語盡職從知忠盡切

綸音好

書猶見性情醕怡親王寶忠孝爲藩諸朱記成邸藏書余
所見宋本夢溪筆談有皇十一子詒晉齋印朱記又宋刻
溫公書儀有永理私印皇子永理之印朱記

絳雲未逐劫灰紅江左圖書日正中一自新宮三日哭開緇

貝葉唱宗風

錢謙益受之

曹溶絳雲樓書目題詞虞山宗伯生神廟盛時早歲科名
交游滿天下盡得劉子威錢功父楊五川趙汝師四家書
更不惜重貲購古本書賈奔赴捆載無虛日用是所積充
牒幾埒內府視葉文莊吳文定及西亭王孫或過之中年

構拂水山房鑿壁爲架庀其中晚歲居紅豆山莊出所藏
書重加繕治區分類聚栖絳雲樓上大櫝七十有三顧之
自喜曰我晚而貧書則可云富矣甫十餘日其幼女中夜
與乳媪嬉樓上剪燭炆落紙堆中遂燧宗伯樓下驚起焰
已張天不及救倉皇出走俄頃樓與書俱盡余聞駭甚特
過唁之謂余曰古書不存矣宗伯每一部書能言舊刻若
何新板若何中間差別幾何驗之纖悉不爽蓋於書無不
讀去他人徒好書束高閣者遠甚然大偏性未爲深愛古
人者有二端一所收必宋元板不取近人所刻及鈔本雖
蘇子美葉石林三沈集等以非舊刻不入目錄中一好自
矜尚傲他氏以所不及片楮不肯借出儘有單行之本燼

後不復見於人間余深以爲鑒戒 天祿琳瑯宋本漢書
錢謙益跋甲申之亂古今書史圖籍一大劫也吾家庚寅
之火江左書史圖籍一小劫也今吳中一二藏書家零星
摺據不足當吾家一毛片羽見者誇詡比于西陽羽陵書
生餓眼但見錢在紙裏中可爲捧腹 人海記錢蒙叟撰
明史二百五十卷辛卯九月晦甫畢越後日絳雲樓火作
見朱人無數出入烟焰中隻字不存昌熾案絳雲災在庚
寅查云辛卯誤也 橋西雜記顧黃公言虞山當絳雲樓
火時親見有緋衣者指揮烈焰上乃大叫曰天能燒我屋
內書不能燒我腹內書指其所撰國史也 牧翁賴古堂
文選序已丑之春余釋南囚歸里盡發 本朝藏書哀輯

史乘得數百帙選次古文得六十餘帙忘食廢寢窮歲月而告成庚寅孟冬不戒於火爲新宮三日之哭知天之不假我以斯文也息心栖神皈依內典世間文字眇然如塵沙積劫矣又與王阮亭書哀遲潦倒賣身空門舊學無幾遺忘殆盡惟有日繙貝葉銷閒送老云云見古夫于亭雜錄昌熾案牧翁紅豆山莊在虞山拂水巖然考有學集題李長蘅畫扇冊後亦署碧梧紅豆村莊又有燕譽堂雲上軒榮木樓並見讀書敏求記宋本漢書跋末云癸未中秋書於半野堂海虞瞿氏所藏宋史有牧翁題字云庚寅十月初二夜半野堂火片刻灰燼據此則絳雲樓下卽半野堂所在矣一號蒙叟其題易箋云余再蒙大難思文

明柔順之義自名爲蒙叟又號東澗其遵王四子字序云
頃者吉州施偉長謁臨海先廟觀周成王饗彭祖三事鼎
二足篆東澗二字蓋周家卜洛時欵識也余老耄不忘先
烈遂自號東澗遺老其題介立詩又署峩嵒老衲徹修爲
太學生約之翁君作墓表又題石渠舊史其藏書一印曰
如來眞子天子門生士禮居題跋陽春白雪惠香閣物惠
香閣柳如是所居卷中有牧翁印有惜玉憐香一印

東澗方羊如海若述古猶能得什三羣從翩翩雖嗜古執圭

僅許視諸男

錢謙貞履之
孫興祖孝修

子孫保求亦

孫艾仲頤

族

錢謙益述古堂宋刻書跋辛丑暮春過遵王述古堂觀宋
刻書縹青介朱裝潢精緻殆可當我絳雲之什三 又錢

令人趙氏墓志銘我曾王父體仁生五子長爲我王父順
時仲山東副使諱順德副使仲子世顯生謙貞謙貞生孫
保孫保娶趙文毅用賢之曾孫女太子中允士春之女也

又列朝詩傳謙貞字履之初失祖父母徐守節自誓先
君翼而長之故履之雖從祖弟猶吾弟也早謝舉子業闢
懷古堂以奉母簾戶靜深書籤錯列年五十餘遭世亂坎
壈不得志卒其孤孫保能讀父書 愛曰精廬藏書志李
羣玉唐風集皆有錢履之讀書記板心有竹深堂三字昌
熾案竹深謙貞七世祖洪自號也錢陸燦常熟縣志洪字
理平與兄寬字理容世家奚浦能詩好客洪愛種竹堂曰
竹深處寬號柳溪列朝詩傳府君有竹深遺稿藏於家

天祿琳琅孔子家語有錢求赤讀書記彭城匪庵諸印祥
符周季貺云求赤校讎精審曰讀書夜必記於卷尾曰某
日讀若干頁某日起某日竟其勤如此所評明代詩文曰
匪庵選本 馮舒懷舊集履之次子孫艾字頤仲僅二十
卒頤仲亦喜誦讀每與人通假鈔錄朱黃兩毫不去手篆
刻似文彭昌熾案馮稱頤仲爲謙貞次子當爲求赤之弟
懷舊集有頤仲次韵求赤家兄詩其明徵也又案求赤一
名容保余所見藏書皆有錢孫保一名容保方印 海虞
詩苑錢興祖字孝修號幔亭久館京師晚厯邊徼年逾五
十以客死 又錢興國字孝標一名炳字峯山幔亭之弟
也 鐵琴銅劍樓書目六韜錢孝修從宋本影鈔孝修遵

王從子昌熾案孝修一名純余所見明刻山谷外集注有
虞山錢純孝修氏原名興祖朱記又案錢氏諸子又有錢
天保字羽王見賞於宗老東澗見海虞詩苑瞿目陸宣公
集求赤孝修遞相藏弄皆有名印又有錢孫臨一印鴻蒙
一印孫臨當亦其昆弟行而鴻蒙其字也求赤藏書處曰
懷古堂卽履之築以奉母者孝修曰在茲閣瞿氏所藏十
六國春秋爲其家藏板心有此三字

張鐙高宴白門秋費盡黃金與翠裘麵肆酒坊論秤買蠟車

障壁雜泥髹

錢裔肅嗣美

子曾遵王

孫沅楚殷

錢謙益族孫嗣美墓志銘從孫嗣美好聚書書賈多挾策
潛往余心喜其同癖又頗嫌其分吾好也天啟間官史局

與中州王損仲商訂宋史損仲言王偁東都事略藏李少卿家搜篋中獲之繕寫以歸人言嗣美家有宋刻善本而
未信也辛丑從其子曾見之刻書精好闕文具在則其捐
館舍已十有六年矣嗟乎以余之於斯文窮年盡氣搜討
不可謂不力而宋代遺文頽頽長編者近在家門而不克
知余之闕漏謾聞良可以自愧然王偁之書僅存於蠟車
障壁人不能舉其名氏是子也顧獨能知而藏之藏之
久至身代銷沈之後而余乃始徬徨展玩伫想於斯人則
古人所謂家有名士三十年而不知者固未可謂之晚也
嗣美名裔肅萬厯乙卯以春秋舉順天卒於丙戌歲之十
月年五十有八子四人長召亦舉於鄉次名次曾次魯曾

好學藏書益富 遵王述古堂藏書自序余二十年食不

重味衣不完采辦當家資悉藏典籍中如蟲之負版鼠之
搬薑甲乙部居粗有條理憶年驅雀時從先生長者游得
聞其緒論逮壯有志藏弄始次第訪求問津知塗幸免於
冥行摘埴然生平所嗜宋槧本爲最馮定遠每戲予曰昔
人佞佛子佞宋刻乎相與一笑而不能已於佞也世間聚
散何常百六飄回絳雲一燼圖史之厄等於秦灰今吾家
所藏不過一毛片羽焉知他年不爲有力者捆載而去抑
或散於麴肆酒坊論秤而盡俱未可料總之不值達人之

一晒耳 又寒食夜夢牧翁詩絳雲脈望收燼餘緗帙縹

囊喜充牣盡說傳書與仲宣只記將車呼子慎自注云絳

雲一燼之後所存書籍大半皆趙元度脈望館校藏舊本
公悉舉以相贈 吳焯敏求記跋錢遵王此書成局置篋
中出入每自攜靈蹤微露竹垞謀之甚力終不可見後典
試江左遵王會於白下竹垞故令客置酒高譙約遵王與
偕私以黃金翠裘予傳書小史啟鐫預置楷書生數十於
密室半宵寫成而仍返之 鐵琴銅劍樓書目宋葵本尙
書十三卷吾邑錢楚殷藏本楚殷名沅遵王子也卷首鈐
一圓印云傳家一卷帝王書其珍重如此昌熾案牧翁遵
王四子字序曰東夏字思祚東鎮字思烈東漢字思光東
表字思勳無名沅者俟考遵王藏書處曰也是園曰述古
堂攷陳繼儒妮古錄繆貞得宋紹興丁巳邵諤所進述古

圖研因以述古名堂黃晉卿爲記是述古之名不始於遵王也又案士禮居題跋漢天師世家華陽顧氏本有虞山錢曾遵王莪匪樓藏書十一小字其跋西溪叢語自題貫花道人蕘翁謂取龍龕手鑑序穿貫綫之花語意

萬卷書侔田氏富一拳山共米家橫雕橋退谷相輝映玉鏡蓬壺際

聖明 孫承澤耳伯 梁清標玉立

顏氏尺牘姓氏攷孫承澤字北海號退谷山東益都人順天上林苑監籍明崇禎四年進士 國朝歷官吏部侍郎昌熾案承澤字耳伯北海亦其號也顏氏誤 曹溶萬卷堂藝文目跋明宗室藏書以灌甫宗正爲最孫北海少宰

令祥符就其第鈔經注二百餘冊載歸京師 畿輔通志
承澤築退谷於西山耄而好學有明一代典故尤瞭如指
掌博古精鑒一時圖書之富比之宋田氏云平津館鑒藏
書籍記元板春秋纂例有北平孫氏研山齋圖書朱文方
印 徵刻唐宋祕本書例近代藏書惟北平孫北海少宰
真定梁棠村司農爲冠少宰精於經學司農富於子集昌
熾案棠村梁相國清標號也相國字玉立亦號蕉林直隸
真定人明崇禎癸未進士 國朝官至保和殿大學士精
於鑒賞所藏法書名畫甲天下刻秋碧堂法帖竹垞有題
王維伏生圖云庚戌觀于北平孫侍郎蟄室旣而歸於棠
村梁相國知二公同鄉同官賞鑒亦略同也 翁方綱復